



2023-6

26. juli 2023

All. nr./notatnr.:

2021-907-0001-10

Sull./sagsbeh.: LR/jh

Kommunip utoqqaat illuanni najugaqartussamik pineqartoq akuersitinnagu inissiisimanera pissaanermillu atuisarneq pillugu inatsimmi malittarisassanik malinissimmannginnera isorisariaqarluinnarpoq

Utoqqaat illuanni najugaqartoq (matuma kingornatigut A-mik taaneqartartussaq) piumanngitsoq utoqqaat illuanni najugaqartussatut 2020-mi inissineqarsimasoq, massakkulli utoqqaat illuanni najugaqarnerminik nuannarinnilersimasoq Ombudsmandimut utoqqaat illuanni misissuinermut atatillugu malugeqquneqarpoq. Pisortaqatigiit aamma oqaatigaat A-mut nakkutilliisumik toqqaasogarsimanngitsoq.

Ombudsmandi tamanna pissutigalugu aalajangerpoq kommunip utoqqaat illuanni najugaqartussamik inissiisimanera Ombudsmandi pillugu inatsimmi § 15, imm. 1 tunngavigalugu nammineerluni misissuiffiginiarlugu.

Kommunip A-mik taanna akuersitinnagu utoqqaat illuanni najugaqartussatut inissiisimanera aamma kommunip pissaanermik atuisarneq pillugu inatsimmi taamani atuuttumi najugaqarfimmi najugaqartussatut akuersisitsinani inissisarneq pillugu aalajangersakkanik malinnissimannginnera Ombudsmandip isorisariaqarluinnartutut isigai.

Kommunip A utoqqaat illuanni feriarniarloq isumaqalersillugu ingerlatsinermi ileqqorissaarneq unioqqutillugu salloqittarsimammagu tamanna Ombudsmandip akuerineqarsinnaanngitsutut isigaa, pineqartorpiarmi unaasimammat A utoqqaat illuanni ataavartumik najugaqalissasoq kommuni aalajangiisimasoq.

*Suliaq ingerlasimanera tamakkerlugu kommunimit uppernarsaasorsorneqarsi-
mannginnera taamalu kommunip paasitineqarsinnaatitaaneq pillugu inatsit
tunngavigalugu allattuisussaataaernerminik eqqortitsisimannginnera Ombuds-
mandip isorisarialittut isigaa.*

*Kommuni qinnuigaara oqaaseqaatima kommuni qanoq iliuseqarnissamut pis-
sutissaqalersinneraa uannut nalunaarutigeqqullugu.*

*Ombudsmandi suliami annertunerusutigut kukkussuteqartoqarsimasoq sumi-
ginnaasoqarsimasorlu isumaqarami Inatsisartut Inatsisinut Ataatsimiititaliaat
aamma kommunalbestyrelsi oqaaseqaammik Ombudsmandi pillugu inatsimmi
§ 23 tunngavigalugu nalunaarfigai.*

(Oqaaseqaat 26. juli 2023-meersoq, j.nr. 2021-907-0001)

Tamatuma kingortigut imatut oqaaseqaateqarpunga:

1. Suut misissorpakka?

1.1. Suliaq manna nammineerlunga misissuiffigaara. Inatsisartut Ombudsman-
diat pillugu inatsisartut inatsisaanni nr. 7-imi, 1. juni 2017-imeersumi (matuma
kingornatigut Ombudsmandi pillugu inatsimmik taaneqartartussami) § 15, imm.
1 innersuussutigaa.

Kommunip A illoqarfimmi Y-mi utoqqaat illuanni najugaqartussatut inissikka-
miuk pissaanermik atuisarneq pillugu inatsimmi taamani atuuttumi najugaqar-
fimmi najugaqartussatut akuersisitsinani inissiisarneq pillugu aalajangersakkat
malissimanerai misissuininni isummerfiginiarlugu aalajangerpunga.

Tamatuma saniatigut kommunip A-mut pissusilersorsimanera eqqarsaatigalugu
ingerlatsinermi ileqqorissaarnermi tunngaviit pillugit isummorsorpunga.

Kiisalu kommunip allattuisussaataanera isummerfigaara.

A 2020-mi oktoberimi utoqqaat illuanni najugaqartussatut inissinneqarnini pillugu paasitinneqarnini tunngavigalugu, puigortunngorsimaninilu pissutigalugu, akuersisinnaasimassagaluarnersoq misissuininni isummerfiginngilara.

A ikiorniarlugu kommuni utoqqaat illuanni najugaqartussatut akuersisitsinani inissiingikkaluarluni ikiorsiiniutinik akuliuffiunnginnerusunik atuisinnaasimagaluarnersoq misissuininni aammattaaq isummerfiginngilara.

1.2. Ajornartorsiutinik taamaattunik siusinnerusukkut nammineq suliarinnissimangikkaangama Danmarkimi atuakkiaasimasut aamma Folketingip Ombudsmandiata periaasia oqaaseqaatinni arlalitsigut aallaavigisarpakka. Kalaallit Nunaanni inatsiseqartitsinikkut tunngaviup aamma Danmarkimi inatsiseqartitsinikkut tunngaviup pingaarnerusutigut assigiinnerat tamatumunnga pissutaavoq. Kalaallit Nunaanni inatsiseqartitsinikkut tunngavik Danmarkimi inatsiseqartitsinikkut tunngavimmit allaasoq isumaqaraangama tamanna oqaatigisarpara.

Oqaaseqaatiga imatut tulleriinnilerneqarpoq:

- Immikkoortoq 2. Suliaq pillugu naatsumik oqaatigisassat
- Immikkoortoq 3. Inatsiseqartitsinikkut tunngavigisaq
- Immikkoortoq 4. Kommunip isumaa 4
- Immikkoortoq 5. Uanga naliliinera

Oqaatigaara suliap ingerlasimanerata allaaserineqarnera oqaaseqaammut tulliummat.

2. Suliaq pillugu naatsumik oqaatigisassat

Angerlarsimaffimmi ikiortip A nunaqarfimmi X-imi nammineq illuani 20. februar 2020-mi pulaarpaa. Angerlarsimaffimmi ikiorti naliliivoq A-p angerlarsimaffia assut eqqiartariaqalersimasoq, taamaaliortoqarneranilu nunaqarfimmi X-imi utoqqaat illuanni najugaqassasoq. Utoqqaat illuat taanna utoqqaat najugaqatigiiffiattut ingerlanneqarpoq, tassanilu ataasiakkaaraluni naliineq tunngavigalugu angerlarsimaffimmi ikiortiliisoqartarluni.

A puigortunngorneq pillugu misissorneqarsimanerluni peqqinnissaqarfimmut paasiniaasoqarsinnaasoq akueralugu ulloq taanna atsiorpoq.

A 23. februar 2020-mit 6. marts 2020-mut illoqarfimmi Z-imi napparsimmavimmi uninngavoq, puigortunngorsimanersaq misissorneqarluni.

Napparsimmaviup kommuni allakkatigut 27. marts 2020-meersutigut nalunaarfigaa A akunnattumik sakkortussuseqartumik puigortunngorsimasoq, tusillassimasoq tusartaatitaassasorlu. A misissorneqarnermi kingornatigut nunaqarfimmi X-imi utoqqaat illuannut uterpoq.

Suliami allattuiffimmi allatamit 25. februar 2020-meersumit erserpoq A nunaqarfimmi X-imi utoqqaat illuannut nukingiullugu inissinneqartoq.

Nakorsap naliliinera kommunimi suliamik suliarinnittup nunaqarfimmi X-imi utoqqaat illuannut, illoqarfimmi Y-mi pensionisialeriffimmi sulianik suliarinnittumut aamma angerlarsimaffimmi ikiorteqartitsinermik ataqatigiissaarisumut 7. april 2020-mi nassiuppaa.

A nunaqarfimmi X-imi utoqqaat illuanni najugaqalerumalluni 14. april 2020-mi qinnuteqarpoq. Qinnuteqaat A-mit atsiorneqarsimavoq.

A illoqarfimmi Y-mi utoqqaat illuannut qaqugu nuunniarnerisq nunaqarfimmi X-imi utoqqaat illuata pisortaata kommunimi suliamik suliarinnittumut 3. august 2020-mi apequtigaa. Pisortaq allappoq A illoqarfimmi Y-mi utoqqaat illuata inaarlugu suliarineqarnissaata tungaanut nunaqarfimmi X-imi utoqqaat illuanni najugaqarallartoq. Pisortap oqaatigaa A puigortunngoriartortoq takorruiniartarlunilu, tamannali ulluinnarni malunnarpallaanngitsaq. A-li illuminut utertalersimavoq, neriartuinnarlunilu utoqqaat illuannukartarluni. Pisortap aamma oqaatigaa A-p kisimiinneq sungiusimanerugaa, utoqqaallu illuanniitsinniarlugu pinngitsaalisinnaanngikkitsik.

Suliami allattuiffimmi allatamit 3. august 2020-meersumit erserpoq nunaqarfimmi X-imi utoqqaat illuata pisortaa akineqarsimasoq illoqarfimmi Y-mi utoqqaat illuata A-mik inissiinissamut piareersaatai kinguaattoorsimasut.

Suliami allattuiffimmi allatamit 14. september 2020-meersumit erserpoq A utoqqaat illuannit nammineq illuminut nuussimasoq, utoqqaallu illuanni najugaqartin-niarlugu pinngitsaalineqarsinnaanngitsoq, oqarsimammammi utoqqaat illuanni najugaqarusunnani.

Kommunip pillorisaasuisa ilaata angalatitap A angerlarsimaffiani 15. september 2020-mi pulaarpaa. A-p peqqissusiata atugarissaarneratalu assut ernummatigineqarnerat, ikioqqunnginnera il.il. pissutigalugit pulaarneqarpoq.

Kommunimi sulisut A angerlarsimaffiani 13. oktober 2020-mi pulaarpaat. A nunaqarfimmit X-imit illoqarfimmi Y-mi utoqqaat illuannut 14. oktober 2020-mi aallarpoq. Kommunimi sulisunit ingiaqatigineqarpoq.

Suliami allattuiffimmi allatamit 15. oktober 2020-meersumit erserpoq A illoqarfimmi Y-mi utoqqaat illuannut nuutsinneqassasoq inissiiniarluni ataatsimiinnermi kingullermi aalajangiisoqarsimasoq, kommunillu nunaqarfimmut X-imut tullianik angalanerani taamaaliornissaanik pilerisaarlugu misilinniaaraa. Suliami allattuiffimmi allatamit tassannga aammattaaq erserpoq kommunip taamatut najugaqarneq qasuersaarluni najugaqarnertut siullermik taaniaraa. A illoqarfimmi Y-mi utoqqaat illuanni najugaqartussatut nuunnissaminut tamatumunnga peqatigitillugu sungiusarneqarniarpoq.

Kiisalu suliami allattuiffimmi allatamit tassannga erserpoq A 13. oktober 2020-mi pulaarneqarnermini oqarsimasoq aallarnissani merserigini, tamannalu tunngavigalugu paasitinneqarsimasoq illoqarfimmi Y-mi utoqqaat illuannut qasuersaariarluni feriassasoq, taamaalillunilu aallaqataanissani akuerisimagaa.

Kommunimi sulisup e-mailianit 4. januar 2022-meersumit erserpoq pineqartup A 14. oktober 2020-mi angalaqatigisimagaa. E-mailimit tassannga aamma erserpoq illoqarfimmi Y-mi utoqqaat illuanni qasuersaarnissani A-p 13. oktober 2020-

mi akuerisimagaa. A-li 14. oktober 2020-mi aallarfissaq nalunaaquttap akunne-
ranik ataatsimik sioqqullugu aallarumajunnaarsimavoq. Taamaattumik pisortap
tulliata angerlarsimaffinnilu ikiorteqartitsinermik ataqatigiissarisup A oqarfigisi-
mavaat feriarniarloq, tamannalu tunngavigalugu illoqarfimmi Y-mi utoqqaat il-
luannut aallarsimasoq.

3. Inatsiseqartitsinikkut tunngavigisaq

3.1. Pissaanermik atuisarneq pillugu inatsit

Piffissami A-p illoqarfimmi Y-mi utoqqaat illuanni najugaqartussatut akuersitinne-
qarani kommunimit inissinneqarnerata nalaani isumaginninnermik suliasaqar-
fimmi pissaanermik atuisineq pillugu Inatsisartut inatsisaat (matuma kingornati-
gut pissaanermik atuisarneq pillugu inatsimmik taamani atuuttumik taaneqartar-
tussa) nr. 1, 21. november 2013-imeersoq atuuttuuvoq. Pissaanermik atuisar-
neq pillugu inatsit nutaaq 1. januar 2023-mit atuutilerpoq: Isumaginninnermik
suliasaqarfimmi pissaanermik atuisineq pillugu Inatsisartut inatsisaat nr. 8, 20.
juni 2022-meersoq (matuma kingornatigut pissaanermik atuisarneq pillugu inat-
simmik massakkut atuuttumik taaneqartartussa).

Taamaattumik pissaanermik atuisarneq pillugu inatsimmi taamani atuuttumi aa-
lajangersakkat oqaaseqaatinni matumani innersuussutigisarpakka. Aalajanger-
sakkat taakku ikittunnguanik allannguuteqarlutik pissaanermik atuisarneq pillugu
inatsimmi massakkut atuuttumi ingerlateqqinneqarsimapput.

3.1.1. Pissaanermik atuisarneq pillugu inatsisip pingaarnerusutigut siu- nertaa

Pissaanermik atuisarneq pillugu inatsisip taamani atuuttup pingaarnerusutigut
siunertaa ilaatigut tassaavoq inersimasut tarnikkut pissutsimikkut annertuumik
ataavartumillu piginnaanikillimasut inatsiseqartitsinermi innarlitsaalineqarne-
rannik annertusaaviginninniarneq.

Pingaarnertut malittarisassaq unaavoq pissaanermik atuisineq pinaveersaarneqas-
sasoq. Pissaanermik atuisineq pinaveersaarneqarsinnaanngippat pissaanermik a-
tuisineq sapinngisamik annertunerpaamik killilersimaarneqassaaq. Kiisalu pinngit-
saaliinikkut iliuuserineqartut anguniarneqartumut naapertuuttuussapput. Taa-

maalilluni iliuuseq akuliuffiunnginnerpaaq toqqarneqartartussaavoq, taamatut-taarlu akuliunneq siunertarlu imminnut naapertuuttuusussaallutik. Tamakku pis-saanermik atuisarneq pillugu inatsimmi taamani atuuttumi §§-ini 1-imi 30-milu imaattunik oqaasertaqartutigit aalajangersarneqarput:

“§ 1. Pissaanermik atuineq isumassuinnermut isumaginninnikkullu perorsaalluni ikiuun-nermut taarsiullugu atorneqanngisaannassaaq, pisariaqarluinnartunullu killilerneqas-salluni, aammalu pissaanermik atuinnikkut anguniakkanut naapertuutissalluni.”

aamma

“§ 30. Pissaanermik atuinerit allatigulluunniit nammineq aalajangiinissamut pisinnaa-titaaffimmut akuliunnerit qanorluunniit ittut atorneqalersinnagit, iliuuseqarfiginninner-nut pisariaqartinneqartunut inuk pineqartoq nammineq piumassutsimik peqataatin-niarlugu kommune sumiiffigisaq periarfissanik tamanik atuissaaq.

Imm. 2. Pissaanermik atuineq anguniakkamut naleqqiullugu imminnut naapertuuttu-mik atsikkutigiissapput. Iliuuseqarfiginninnerit minnerusumik akuliuffiusut naammappata, taakku atorneqassapput.

Imm. 3. Pissaanermik atuineq sapinngisamik mianersortumik sapinngisamillu sivikin-nerpaamik pissaaq, aamma pineqartumut allanullu najuuttunut sapinngisamik mia-nerinnilluni pissalluni, taamaasilluni pisariaqanngitsumik kanngunarsaasoqassanngim-mat akornutissarsisoqaraniluunniit. Nikanarsaataasumik, asissuisumik allatigulluunniit nikassaasumik pinninneq inerteqqutaavoq.

Imm. 4. Akuliunnerup suliamut attuumassuteqartumik imminut illersorsinnaassusia-nik pisariaqassusianillu kiisalu pineqartup peqqissutsimigit qanoq issusianik inunnut ataasiakkaanut naliliisoqarsimanissaa immikkoortoq manna naapertorlugu akuliunner-nut piumasaqaataavoq.”

Pissaanermik atuisarneq pillugu inatsimmi taamani atuuttumi pingaarnertut siu-nertaq pingaarnertullu malittarisassaaq pissaanermik atuisarneq pillugu inatsimmi massakkut atuuttumi ingerlateqqinneqarsimapput, tak. pissaanermik atuisarneq pillugu inatsimmi massakkut atuuttumi § 1.

Pissaanermik atuisarneq pillugu inatsimmi taamani atuuttumi immikkoortut I aamma III inersimasunut tarnikkut pissutsimikkut annertuumik ataavartumillu piginnaanikillimasunut, pisortat assiigiinngitsutigit ikiorsiiniutinik kiisalu isuma-

ginninnermi perorsaanikkut ikiuinnermik, paaqutarinninnermik imaluunniit sammisassaqtitsinikkut neqeroorutininik assigisaannillu aallartitsivigisimasaannut, pissaanermillu atuisarneq pillugu inatsimmi taamani atuttumi §§-it 32-mit 36-mut tunngavigalugit iliuuseriniarneqartunut akuersaanngitsunut atorneqartussaapput. Tamanna pissaanermik atuisarneq pillugu inatsimmi taamani atuttumi § 3-kkut aalajangersarneqarpoq. Aalajangersagaq taanna pillugu oqaaseqaatinit ilaatigut makku erserput:

“Inuit tarnikkut pissutsimikkut annertuumik ataavartumillu piginnaanikillisisimanertik pissutigalugu imminnut isumagisinnaanngitsut, tamannalu pissutigalugu namminnek aalajangiinissamut pisinnaatitaaffimminnik piviusunngortitsinissamut annertuumik ajornartorsiuteqartut pisariaqartitaminnik ikiorneqassapput, isumassorneqarlutik paaqutarineqarlutillu il.il., peqatigisaanillu ataasiakkaanut inatsisitigut isumannaatsunissaq attanneqaannassalluni.”

Aalajangersagaq taanna pissaanermik atuisarneq pillugu inatsimmi massakkut atuttumi § 32-kkut ingerlateqqinneqarpoq.

2021-mi ukiumoortumik nalunaarutinni immikkoortumi 2.3-mi allaaserisaq “Najugaqarfittut neqeroorummi najugaqartussatut pineqartumik akuersisitsinani inissiineq”-mik qulequtaqartoq aammattaaq innersuussutigaa.

3.1.2. Najugaqarfittut neqeroorummi najugaqartussatut pineqartumik akuersisitsinani inissiineq

Najugaqarfittut neqeroorummi najugaqartussatut pineqartumik akuersisitsinani inissiineq annertoorejussuarmik akuliulluni pinngitsaaliinikkut iliuusaavoq. Pissaanermik atuisarneq pillugu inatsit taamami atuttoq najugaqarfittut neqeroorummi najugaqartussatut pineqartumik akuersisitsinani inissiisoqarsinnaaneranut periarfissiivoq. Piumasaqaataasutut erseqqinnerusumik taaneqartut eqqortinneqarsimappata taamaaliortoqarsinnaavoq.

Pissaanermik atuisarneq pillugu inatsimmi taamani atuttumi § 36, imm. 1-ikkut aamma imm. 4-kkut makku aalajangersarneqarput:

“§ 36. Inuup nuunnissamut akerliusup imaluunniit tamatumunnga paasinartumik akuersinissamut piginnaasaqanngitsup, taamaattoq tak. imm. 2, isumaginninnermut inatsisit naapertorlugit najugaqarfissatut neqeroorummut aalajangersimasumut tigtinnissaa aalajangiiffiqqullugu kommunimi sumiiffigisami kommunalbestyrelsi, tak. § 42, Ilaqutariinnermut Naalakkersuisumut inassuteqarsinnaavoq, imaappat:

1) pineqartup pisariaqartitaminik ikiorneqarsinnaanissaanut tamanna pisariaqarluinnarpat, aamma

2) ikiuineq inuup maannamut angerlarsimaffigisaani ingerlanneqarsinnaanngippat, aamma 3) pineqartup iliuutsimi kinguneri paasisinnaanngippagit, aamma

4) pineqartoq inuttut annertuumik ajoqusernissamut imminut aarlerinartorsiortippat, aamma 5) nuunnissaata isumagineqannginnera illersorneqarsinnaanngippat.

[...]

Imm. 4. Kommunalbestyrelsip imm. 1 aamma 2 naapertorlugit naliliinerani, taamaattoqarpat uiusup nuliaasulluunniit, inooqatigisap allatigulluunniit ilaqutaasup pineqartup pisariaqartitaanik ikiuunnissamik nakkutilliinissamillu isumaginnissinnaajunnaarsimanera ilaatinneqassaaq.

[...]”

Taamaalilluni pissaanermik atuisarneq pillugu inatsimmi taamani atuuttumi § 36, imm. 1-ikkut aalajangersarneqarpoq inuk najugaqarfittut neqeroorummi najugaqartussatut akuersitinnagu kommunalbestyrelsip inissinniarpagu kommunimi uningavigisami kommunalbestyrelsi tassaasoq Ilaqutariinnermut Naalakkersuisumut inassuteqaateqaammik suliarinnittussaq.

Aalajangersagaq taanna inunnut tarnikkut pissutsimikkut annertuumik ataavartumillu piginnaanikillimasunut tunngasuvoq. Piumasaqaatit tulleriarlugit taagorneqartut tamarmik eqqortinneqartussaapput. Tassa imaappoq najugaqarfimmi najugaqartussatut akuersisitsinani inissiisoqassappat piumasaqaataasoq inuup pisariaqartumik ikiorneqassaguni nuutsinneqarnissaa pisariaqarluinnassaasoq, ikiuineq inuup pineqartup angerlarsimaffiani ingerlanneqarsinnaassanngitsoq, inuup pineqartup iliuutsimi kingunerisai paasisinnaassanngikkai, inuk pineqartoq annertuumik ajoqusernissamut imminut aarlerinartorsiortitsisuussaasoq nuunnissaatalu isumagineqannginnera illersorneqarsinnaassanngitsoq. Pineqartup katissimallugu aappaata, inooqataata ilaqutaataluunniit allap inummik pi-

neqartumik pisariaqartumik ikiorneqarneranik nakkutigineqarneranillu isumagin-nissinnaajunnaarnera kommunalbestyrelsip naliliinermini aamma isiginiassavaa.

Aalajangersagaq taanna pissaanermik atuisarneq pillugu inatsimmi massakkut a-tuuttumi § 36-kkut ikittunnguanik allannguuteqartinneqarluni ingerlateqqinne-qarpoq. Pissaanermilli atuisarneq pillugu inatsit 1. januar 2023-mi atuutilersumik allannguuteqartinneqarpoq. Kommuni uninngavigisaq siusinnerusukkut tassaasimavoq Ilaqutariinnut Naalakkersuisoq aalajangeeqqullugu inassuteqaateqar-tussaq, massakkulli kommuni najugarivitaq tassaalerpoq taamatut inassuteqaateqartussaq.

Inuup pineqartup suliamik suliarinninnermi soqutigisaminik isumaginninnissami-nut eqqartuussissuserisumit ikiorneqarnissaa kommunalbestyrelsip isumagisas-saraa. Tamanna pissaanermik atuisarneq pillugu inatsimmi taamani atuuttumi § 43-kkut aalajangersarneqarpoq. Kommunalbestyrelsi tassaavoq eqqartuussissu-serisumut aningaasartuutitik akiliisussaq. Aalajangersagaq taanna pissaanermik atuisarneq pillugu inatsimmi massakkut atuuttumi § 54-ikkut ingerlateqqinne-qarpoq.

Kommunimi uninngavigisami kommunalbestyrelsi tassaavoq Ilaqutariinnut Naa-lakkersuisumut inassuteqaateqartussaq, Naalakkersuisorlu taanna tassaalluni najugaqarfittut neqeroorummi najugaqartussatut akuersisitsinani inissiisoqarnis-saanik aalajangiisussaq. Kommunalbestyrelsip inassuteqaataa pissutsit pissaa-nermik atuisarneq pillugu inatsimmi taamani atuuttumi § 42, imm. 2, nr. 1-5-imi taaneqartut pillugit nassuiaammik imaqaassaaq.

Inuk pineqartoq nakkutilliisoqanngippat pineqartup nakkutilliisumik toqqaassun-neqarnissaa kommunalbestyrelsip tassunga ilanngullugu eqqartuussivimmut qin-nutigissavaa.

Pissaanermik atuisarneq pillugu inatsimmi taamani atuttumi § 42-kkut makku aalajangersarneqarput:

“§ 42. Kommunimi sumiiffigisami kommunalbestyrelsip inassuteqarneratigut najugaqarfissatut neqeroorummut akuersinani tigutinnissamut Ilaqutariinnermut Naalakkersuisoq § 36 naapertorlugu aalajangiissaaq. Kommunalbestyrelsip inassuteqaataata tigungeranit kingusinnerpaamik sapaatit akunneri marluk qaangiutsinnagit aalajangiisogassaaq. *Imm. 2.* Inassuteqaat tulliuttut pillugit nassuiaammik imaqassaaq:

1) § 36, imm. 1-imi 3-milu piumasaqaatit eqqortinneqarsimasutut isigineqarnerannut tungavik,

2) piginnaanikillisisimaneq pillugu suliamut attuumassuteqartumik uppernar-saatit pisariaqartinneqartut,

3) najugaqarfissatut neqeroorummut immikkut ittumut tigutinnissamik inassuteqarnissaaq aalajangiunneqartinnagu, pineqartumut ilaqutaasunulluuniit ikiuunneq paaqqutarinninnerlu ingerlanneqarsimasooq neqeroorutigineqarsimasorluunniit,

4) najugaqarfiup nutaap pequtsersugaanera, inuttut ikiorneqarneq, paaqqutarineqarneq tapersersorneqarnerlu il.il., pineqartumut atugassiissutigineqarsinnaasut, aamma

5) inuup pineqartup nammineq ilaqutaasullu, taamaattoqarpallu nakkutilliisup nuunnissaaq pillugu oqaaseqaataat.

Imm. 3. Uusoq nuliaasorluunniit allatigulluunniit qanigisaq, inummik suliami pineqartumik najugaqateqartoq, pineqartup najugaqarfissatut neqeroorummut immikkut ittumut aalajangersagaq manna naapertorlugu tigutinnissaanik inassuteqarnissamut kommunalbestyrelsip itigartitsinerata naammagittaalliutiginissaanut pisinnaatitaaffeqarpoq. Naammagittaalliut Isumaginninnermi Naammagittaalliuteqartarfimmut apuunneqassaaq.

Imm. 4. Pineqartoq nakkutilliisoqariingippat, nuunnissamut inassuteqartoqartillugu oqartussaassuseq pillugu inatsit naapertorlugu nakkutilliisumik ivertitsinissamik kommunalbestyrelsip kredsretti qinnuigissavaa.

Imm. 5. Nuunnissamik aalajangiineq piviusunngortinniarlugu kommunip politiit pisariaqarpat ikiuteqqullugit qinnuigisinnaavai.”

Pissaanermik atuisarneq pillugu inatsimmi tamaani atuttumi najugaqarfittut neqeroorummi najugaqartussatut akuersisitsinani inissiisoqarnissaanik Ilaqutariinnut Naalakkersuisup aalajangiisarneri pillugit § 42-mi aalajangersakkat pissaanermik atuisarneq pillugu inatsimmi massakkut atuuttumi ikittunnguanik allannguuteqartillugit § 37-kkut ingerlateqqinneqarput. Allannguutit ilaat tassaavoq kommunip najugarivitap aalajangiisooqarnissaanik Ilaqutariinnut Naalakkersuisu-

mut inassuteqaateqartussaalerneq, siusinnerusukku kommunin uningavigisaq inassuteqaateqartartussaasimagaluartoq.

Tassani aamma ilaavoq pissaanermik atuisarneq pillugu inatsimmi taamani atuuttumi kommunalbestyrelsip nakkutilliisumik toqqaqqusilluni eqqartuussivimmut qinnuiginnittussaataanerani § 42, imm. 4-ikkut aalajangersakkap pissaanermik atuisarneq pillugu inatsimmi massakku atuuttumi § 36, imm. 5-ikkut ingerlateqqinneqarnera.

Ilaqutariinnut Naalakkersuisup najugaqarfissatut neqeroorutinut aalajangersimasunut § 36, imm. 1 aamma 3 tunngavigalugit inissiisoqarnissaani § 42 tunngavigalugu aalajangiinera Isumaginninnermi Naammagittaalliuuteqartarfimmut isumaginnittoqarfiup aqunneqarnera aqqissuussaanelu pillugit Inatsisartut peqqussutaanni aalajangersakkat tunngavigalugit naammagittaalliuutigineqarsinnaavoq, tak. pissaanermik atuisarneq pillugu inatsimmi § 49. Aalajangersagaq taanna pissaanermik atuisarneq pillugu inatsimmi massakku atuuttumi § 70-ikkut ingerlateqqinneqarpoq.

3.2. Ingerlatsinnermi ileqqorissaarneq

Ingerlatsinnermi ileqqorissaarnermi oqartussaasut innuttaasunik qanoq pinnittariaqarnerat pillugu malittarisassat tunngaviillu inatsisikkut aalajangersagaangitsut atuupput.

Ingerlatsinnermi ileqqorissaarnermik oqarnermi pineqarpoq oqartussaasoq innuttaasunut inussiarnersumik mianerinnittumillu innuttaasullu oqartussaasumik ta-tiginninnerannik sakkortussaasumik pissusilersortassasoq.

Ingerlatsiviup innuttaasunik attaveqarfiginninnerani oqaatsit suliamut attuumasuteqartut mianerinnittullu atorneqartussaapput.

Oqartussaasunut ilitersuummi nittartakkanni atuarneqarsinnaasumi immikkoortoq 1 aammattaaq innersuussutigaa.

Innuttaasup ingerlatsiviullu tatigeqatigiinnerat ingerlatsiviup iliuusaanut aalajangiinerinullu tunngavilersuutit qularinnilersitsisuunnginnerisigut ilaatigut pilersineqartarpoq.

Hans Gammeltoft-Hansenip allallu atuakkiaanni "Forvaltningsret"-imi 2002-meersumi quppernermi 642-mi Jens Olsenip ilanngussaa aammattaaq innersuusutigaara.

3.3. Allattuisussaataaneq

Oqartussaasooq paasissutissat suliap aalajangiivigineqarneranut pingaaruteqartut pillugit allattuisussaavoq.

Paasissutissat suliap soorlu suliamik suliarinnittumut allamut tunniunneqarnerani tammartannginnissaasa qulakkeerneqarnissaat allattuisussaataanerup siunertaraa. Taamaalilluni allattuisuussaataaneq oqartussaasup eqqortumik tunngaveqarluni paasissutissartalorsorluagaasumillu aalajangiisarnissaanik qulakkeereqataavoq.

Suliami susoqarsimanerata kingusinnerusukkut uppersarneqarsinnaanera allattuisussaataanerup aamma qulakkeereqataaffigaa. Tamakkua saniatigut allattuisussaataanerup eqqortinneqarnera oqartussaasup eqqortumik iliuseqarsimaneranik sunniuteqarluartumik nakkutilliinissamut periarfissiivoq, tassami paasissutissat suut oqartussaasup piginerai pigisimaneeralu qangalu pigisimaneerai takuneqarsinnaasarmat.

Allattuisussaataaneq pisortat ingerlatsinerat pillugu paasitinneqarsinnaatitaaneq pillugu Inatsisartut inatsisaanni nr. 9-mi, 13. juni 1994-imeersumi (matuma kingornatigut paasitinneqarsinnaatitaaneq pillugu inatsimmik taaneqartartussami) § 6, imm. 1-ikkut aalajangersarneqarpoq:

"Suliassani ingerlatsinermut oqartussaasunit aalajangiiffigineqartussani oqartussaap paasissutissanik suliassamut tunngassuteqarluinnartumik suliassap aalajangiiffigineqarnissaanut pingaaruteqartunik oqaasiinnakkut pissarsisoq, paasissutissanilluunniit taamaattunik allatut iliorluni paasisaqartoq paasissutissat taakku imaat pillugit allak-

kiussaaq. Taamaattorli paasissutissat taakku suliassap allakkiartaasa ilaanni takuneqarsinnaappata tamanna atuutinngilaq.”

Inatsiseqartitsinikkut tunngavik nalinginnaasoq (inatsisikkut aalajangersagaanngitsoq) inatsisikkut aalajangersagaasumik allattuisussaataaernermut uiggiulluni atuuppoq, tassuunalu aalajangersarneqarluni ingerlatsinermi oqartussaasoq suliami iliuuserineqartut pingaaruteqartut tamaasa pillugit allattuisussaataasoq, suliami iliuuserineqartut taakku suliami allagaatini allani takuneqarsinnaariinngippata.

Tamatuma saniatigut ingerlatsinermi ileqqorissaarnerup manna nassataraa, tassalu innuttaasup ingerlatsiviullu tatigeqatigiilernissaat ingerlatsiviup isumagissaa. Tamanna ingerlatsiviup suliami susoqarsimaneranik qanorlu oqartoqarsimaneranik nalornissutigineqalersitsinaveersaarneratigut ilaatigut pisinnaavoq, tak. Hans Gammeltoft-Hansenip allallu atuakkiaanni “Forvaltningsret”-imi 2002-meersumi quppernermi 642-mi Jens Olsenip ilanngussaa.

Oqartussaasoq suliami iliuuserineqartut pingaaruteqartut tamaasa pillugit allattuisariaqarpoq, matumani ataatsimiinnerit ingerlanneqartut ilanngullugit eqqarsaatigalugit. Ataatsimiinnerit pillugit imaqarniliat aammattaaq ullulerneqartariaqarput pisullu ilaanni atsiorneqartariaqarlutik. Siusinnerusukkut oqaaseqaatikka 2010-6.8 aamma 1996-04-5 nittartakkanni atuarneqarsinnaasut innersuussutigaa.

Oqartussaasunut ilitsersuummi nittartakkanni atuarneqarsinnaasumi immikkoortoq 11 aamma 2018-imi ukiumoortumik nalunaarutinni immikkoortumi 2.2-mi allaaserisaq “Ombudsmandeqarfimmi periaatsitigut ajornartorsiutit”-nik qulequartaqtoq aammattaaq innersuussutigaa.

4. Kommunip isumaa

Kommunip suliami allagaatit oqaaseqaallu 7. januar 2022-mi ullulerneqarsimasoq nassiuppai. Kommunip makku oqaatigai:

“[...]”

Kommunip paasissutissiissutiginiarpaa kommunip [A-p] [illoqarfimmi Ymi] utoqqaat illuanni akuersitinnagu inissinneqarnissaanik isumaginninnermik suliassaqarfimmi pissaanermik atuineq pillugu inatsimmi nr. 1-imi, 21. november 2013-imeersumi § 36 tungavigalugu aalajangiisimangimmat.

Kommunip aamma paasissutissiissutiginiarpaa kommunip paasinninnera unaasoq [A-p] inissinneqarnini naggataatigut akerleriunnaaraa, immaqali [nunaqarfimmi X-imi] illuminit aallalernermini utoqqaat illuannut oqilissaassinermut atatillugu najugaqariartorluni aallarusunnerluni aallarusunnginnerluniluunnit nalornissutigisimagaa. [Illoqarfimmi Y-mi] "feriassasoq" oqarfigineqarami aallarusulerpoq, namminerlu piumassutisini tungavigalugu pinngitsaalineqarani aallaruni. Taamaattumik aallernermini angalanerup siunertaanik paasissutissanillu pjarisaqartunik tamanik paasitinneqarneq tungavigalugu aalajangiinissamut tungaviusinnaasunik naammattumik paasisaqarsimanissaa ilimanangitsoq naatsorsuutigineqarsinnaavoq.

Kommunip tikkuarlugu aamma oqaatigerusuppaa [A-p] utoqqaat illuanni inissinneqarneranut atatillugu pisut ingerlasimanerat immikkuualuttulersorlugu massakkut allaserineqarsinnaagunanngitsoq, tassami sulisut taamani pisumi peqataasut ilaat kommunimi suliunnaarsimmata.

[...]" (Ombudsmandeqarfimmi nutsigaavoq)

Suliami allagaatini ilaatigut ilaapput kommunip oqaaseqaataa, suliami allagaatit e-maililu 4. januar 2022-meersoq kommunimi sulisup nassuiaataa. Sulisup nassuiaataa kommunip pissarsiariniarsimavaa, kommuni suliaq pillugu nassuiaateqqullugu suliamilu allagaatit nassiuteqqullugit qinnutigisama 29. november 2021-meersup akineqarnissaa siunertaralugu. Sulisup makku oqaatigai:

"Taamani [A] ulloq 14.10.21 maannga [illoqarfimmut Y-mut] ilaaqatiginikuuara ukua ilagalugit aqutsisoq plejehjemmet, hjemmehjælperkoordinator [illoqarfik Y].

Hjemmehjælperkoordinator ulloq 14.10.21 taanna ilagivara [A-p] illuanut. Qasuersaariassalluni ippassaammagu akuersisimavoq, kisiannilu 1 time aallarfiisarput nallilersoq piumajunnaarpoq, allatut oqaatigiinarlugu feriassasoq [illoqarfimmut Y-mut] piumalerpoq aatsaat tassani. Immaqa ukua akissutissaanik c) paasinartumik tamatumunnga akuersinissamut piginnaasaqarsimangitsoq qaninnerpaavoq.

Una naqqarleq akinissaanut akunnattooqqavunga akisinnaannagulu.

Neriullunga kakkiussamiittut aamma assit atorsinnaassasut ilannguppakka.”

5. Uanga naliliinera

5.1. Najugaqarfittut neqeroorummi najugaqartussatut pineqartumik akuersisitsinani inissiineq

A-p puigortunngoriartulersimanera kommunip 20. februar 2020-mi paasivaa. Kommuni peqqinnissaqarfimmit 27. marts 2020-mi aamma paasitinneqarpoq A akunnattumik sakkortussuseqartumik puigortunngorsimasoq.

A nunaqarfimmi X-imi utoqqaat illuannut 25. februar 2020-mi nukingiullugu inis-sinneqarpoq.

A nunaqarfimmi X-imi utoqqaat illuanni najugaqarnermini utoqqaat illuannit nam-mineq angersimaffimmut uteqattaarsimavoq. A oqarsimavoq kisimiinneq sungiu-simagini utoqqaallu illuanniinnissaminut pinngitsaalineqarsinnaanani. A nammi-neq illuminut 14. september 2020-mi nuussimavoq.

Kommuni inissiiniarluni ataatsimiinnermi qanga pinera erseqqinnerusumik taane-qanngitsumi aalajangerpoq A illoqarfimmi Y-mi utoqqaat illuannut nuutsinneqas-sasoq, taassumalu illuanut pulaarnermi tullermi kommunip taamaaliornissamut pilerisaarlugu misilissagaa.

Naak A utoqqaat illuannut nuutsinneqassasoq tasanilu najugaqartussatut inis-sinneqassasoq kommuni aalajangiisimagaluarluni angerlarsimaffianut 13. okto-ber 2020-mi pulaarnermi oqaluttuussimavaa illoqarfimmi Y-mi utoqqaat illuanni feriasasoq. Kommunip taamaaliornermigut A salloqittarsimavaa.

A tamanna tunngavigalugu illoqarfimmi Y-mi utoqqaat illuannukarluni 14. oktober 2020-mi aallaqataavoq.

Kommunip uannut oqaaseqaammini oqaatigaa A illoqarfimmi Y-mi utoqqaat illuannut aallarnermini angalanerup siunertaanik paasissutissanilluunniit pisariaqartunik tamanik paasitinneqarneq tunngavigalugu aalajangiinissamut tunngaviusinnaasunik naammattumik paasisaqarsimanissaa ilimanangitsoq naatsorsuutigineqarsinnaasoq.

Tamatumunnga ilanngullugu paasivara sulisut A-mik 14. oktober 2020-mi angalaqateqartut ilaata tamanna pillugu nassuiaammini oqaatigigaa nammineq paasinninnini unaasoq A paasitinneqarneq tunngavigalugu aalajangiinissamut tunngaviusinnaasunik naammattumik paasisaqarsimanngitsoq.

Uanga naliliinera unaavoq kommunip A illoqarfimmi Y-mi utoqqaat illuannut akuersitinnagu 14. oktober 2020-mi inississimagaa. Uanga naliliinera aamma unaavoq A-p akunnattumik sakkortussuseqartumik puigortunngorsimanera piffissap taamaalinerani kommunip ilisimasimagaa. Kiisalu uanga naliliinera unaavoq A-p illoqarfimmi Y-mi utoqqaat illuannukarusunnginnera aatsaallu kommunip tasani feriertussaannerminik salloqittarmani aallarusulersimanera sumilluunniit qularutissaanngitsoq.

A-p illoqarfimmi Y-mi utoqqaat illuannut nuukkumalluni qinnuteqaataanik suliami allagaatini peqanngilaq. Taamatuttaaq A-p illoqarfimmi Y-mi utoqqaat illuannut nuukkusulluni oqarsimanera pillugu paasissutissamik suliami allagaatini peqanngilaq.

Uanga naliliinera unaavoq A-p illoqarfimmi Y-mi utoqqaat illuanni inissinneqarnermi nalaani, akunnattumik sakkortussuseqartumik puigortunngorsimanini pis-sutigalugu, pissaanermik atuisarneq pillugu inatsimmi taamani atuuttumi pineqartunut ilaatinneqarnera qularutissaanngitsoq.

Uanga paasinninnera unaavoq A nuutsinneqarami pinaasersimasoq, utoqqaallu illuanni inissinneqarnissani akuerisimanagu.

Isumaqarpunga kommunip A illoqarfimmi Y-mi utoqqaat illuanni akuersitinnagu inississimagaa. Aammattaaq isumaqarpunga kommunip pissaanermik atuisarneq

pillugu inatsimmi taamani atuuttumi najugaqarfittut neqeroorummi najugaqar-tussatut pineqartumik akuersisitsinani inissiisarneq pillugu aalajangersakkat ma-lissimangikkai.

Pissaanermik atuisarneq pillugu inatsit taamani atuuttoq kommunip malissima-suuppagu A nakkutilliisoqarsimassagaluarpoq eqqartuussisserisoqarsimassaga-luarlunilu, pisumi soqutigisaminik isumaginninnissaminut ikiortigisassaminik. Taamaattoqarsimanngilarli.

Tamanna isorisariaqarluinnartutut isigaara.

A utoqqaat illuanni ineqartussatut inissinneqassasoq aalajangeqqullugu kommu-nip pissaanermik atuisarneq pillugu inatsit taamani atuttoq tunngavigalugu Ilaqu-tariinnut Naalakkersuisumut inassuteqaatigisimasussaagaluarpaa, tak. pissaa-nermik atuisarneq pillugu inatsimmi taamani atuuttumi § 36, imm. 1. Tamatuma kingornatigut najugaqarfittut neqeroorummi akuersisitsinani inissiisoqassaner-soq Ilaqutariinnut Naalakkersuisup aalajangertusaassagaluarpaa, Isumaginnin-nermi Naammagittaalliuteqartarfimmut naammagittaalliornissamut periarfissa-limmik, tak. pissaanermik atuisarneq pillugu inatsimmi taamani atuuttumi § 42 aamma § 49.

Kommuni Ilaqutariinnut Naalakkersuisumut inassuteqaateqarnerminut atatillugu eqqartuussivik nakkutilliisumik toqqaaqqullugu qinnuigisimasussaagaluarpaa, tak. pissaanermik atuisarneq pillugu inatsimmi taamani atuuttumi § 42, imm. 4. Taava A-p soqutigisaminik isumaginninnerminut eqqartuussissuserisumik ikiorti-lerneqarnissaa kommunip isumagisussaasimagaluarpaa, tak. pissaanermik atui-sarneq pillugu inatsimmi taamani atuuttumi § 43.

5.2. Ingerlatsinermi ileqqorissaarneq

Suliami allagaatinit erserpoq kommuni inissiiniarluni ataatsimiinnermi qanga pi-nera erseqqinnerusumik taaneqanngitsumi aalajangersimasoq A illoqarfimmi Y-mi utoqqaat illuannut nuutsinneqassasoq, kommunillu nunaqarfimmut X-imut angalanermi tullermi taassuma illuanut pulaarnermi taamaaliornissamut pileri-saarlugu misilissagaa.

Imatut paasivara kommunip sulisuisa A illuani 13. oktober 2020-mi pulaarmassuk taanna oqarsimasoq illoqarfimmi Y-mi utoqqaat illuanni oqilisaassinermut atatilugu najugaqariaqartorluni aallarnissani kissaatigigini. Aamma imatut paasivara A aqaguani aallarumajunnaarsimasoq, kommunillu sulisuata tamatuma kingornatigut oqarfigisimagaa illoqarfimmi Y-mi utoqqaat illuanni feriarniartoq. A illoqarfimmi Y-mi utoqqaat illuanni feriartussaalluni isumaqarluni kommunip sulisua ilagalugu nunaqarfimmit X-imit 14. oktober 2020-mi aallarsimavoq.

Kommunip uannut oqaaseqaammuni oqaatigaa kommunip paasinninnera unaasoq A inissiinermut pinaarsersimanngitsoq, immaqali nunaqarfimmi X-imi illuminit aallalernermini utoqqaat illuannut oqilissaassinermut atatilugu najugaqariartorluni aallarusunnerluni aallarusunnginnerluniluunnit nalornissutigisimagaa. Kommunip oqaatigaa A illoqarfimmi Y-mi "feriassasoq" oqarfigineqarami aallarusuler-simasoq. Tassani aamma ilaavoq sulisup angalaneq pillugu nassuiaammuni oqar-simanera isumaqarluni A paasitinneqarneq tunngavigalugu akuersinissamut tunngaviusinnaasunik naammattumik paasisaqarsimanngitsoq.

Uanga naliliinera unaavoq A illoqarfimmut Y-mut aallarusunngimmat kommunimi sulisut isumaqatigiillutik paasissutissanik eqqunngitsunik tunisimagaat, salloqit-tarlugulu utoqqaat illuanni feriassasoq oqaluttuussimagaat.

Siusinnerusukkut oqaatigineqartutut ingerlatsinermi ileqqorissaarnermi oqartus-saasut innuttaasunik qanoq pinnittariaqarnerat pillugu malittarisassat tunnga-viillu inatsisikkut aalajangersagaanngitsut, innuttaasut ingerlatsivinnik tatiginnin-nerannik ilaatigut sakkortusaasut, atuuqput. Tassani aamma ilaavoq ingerlatsi-viup innuttaasunik attaveqarfiginninnerani oqaatsit suliamut attuumassuteqartut mianerinnittullu atorneqartussaanagerat. Uanga paasinninnera aamma unaavoq paasissutissat pisortani oqartussaasup sulisulluunniit innuttaasumut tunniussai eqqortuusussaasut innuttaasumullu salloqittaataasussaannngitsut.

Uanga paasinninnera aammattaaq unaavoq oqartussaasup, innuttaasup piimi-naalliornera pissusilersornerataluunniit oqartussaasup siunertaanut naapertuu-tinginnera, matumani paasissutissat taakku innuttaasumut ajoqusiisuunerat ilanngullugu eqqarsaatigalugu, pissutigalugu, paasissutissat kinaassusersiorneq

pissutigalugu eqqunngitsut innuttaasumut sukkulluunniit tunngaviginiarsinnaanngikkai. Pissaanermik atuisarneq pillugu inatsit pisoq taanna pillugu aalajangersaaviginnippoq, najugaqarfittullu neqeroorummi najugaqartussatut akuersisitsinani inissiisoqassasoq aalajangiisoqarnissaanik kommunip Ilaqutariinnermut Naalackersuisoqarfimmut inassuteqaateqarnissaanut periarfissiilluni.

Isumaqarpunga kommunip A-mik, taanna eqqunngitsumik paasissutissillugu, utoqqaat illuanni feriertussaananeramik oqarfigalugu salloqittaasimanera ingerlatsinermi ileqqorissaanermik unioqqutitsinerusoq, pineqartorpiarmi tassaasimmat kommuni aalajangiisimasoq A utoqqaat illuanni ataavartumik najugaqalissasoq, taamaattumillu taamaaliornissaanut pilerisaarniarsarisimallugu.

Tamanna akuerineqarsinnaanngitsutut isigaara.

5.3. Allattuisussaataaneq

A illoqarfimmi Y-mi utoqqaat illuannut nuutsinneqassasoq kommunip aalajangiinera pillugu inissiiniartartoqatigiit ataatsimiinnerannit imaqarniliamik uppernarasaataasinnaasumilluunnit allamik suliami allagaatini nassaassaqaangilaq.

Suliami allagaatit tiguneqartut A-p illoqarfimmi Y-mi utoqqaat illuanni kommunimit inissinneqarneranut atatillugu suliap ingerlasimanerata allaaserineqarneranik ilaqanngillat. Taamaallaat suliami nalunaarsuiffimmi allataq 15. oktober 2020-meersoq ilaavoq, tassanilu A-mut 13. oktober 2020-mi pulaarneq illoqarfimmilu Y-mi utoqqaat illuannut 14. oktober 2020-mi aallarnekq allaaserineqarsimallutik.

Kommunip uannut oqaaseqaammuni oqaatigaa A-p illoqarfimmi Y-mi utoqqaat illuanni inissinneqarneranut atatillugu pisut ingerlasimanerat immikkuualuttulersorlugu massakkut allaaserineqarsinnaanngitsoq, tassami sulisut taamani pisumi peqataasut ilaat arlallit kommunimi sulionnaarsimammata.

Oqartussaasoq paasissutissanik suliap aalajangiivigineqarneranut pingaaruteqartunik allattuisussaataavaq.

Kommuni suliap tamarmi ingerlasimanera pillugu allakkatigut uppersaatinik peqanngilaq. Taamalilluni A-p illoqarfimmi Y-mi utoqqaat illuannut nuutsinneqarnissaanik kommunip inissiiniartartoqatigiit ataatsimiinneranni piffissami sumi pinera erseqqinnerusumik taaneqanngitsumi aalajangiisimaneranut uppersaammik piusoqanngilaq.

Uanga tamanna tunngavigalugu naliliinera unaavoq kommunip allattuisussaati-taanini eqqortissimanngikkaa. Suliap uppersaasorsorneqarsimannginnerata A-p illoqarfimmi Y-mi utoqqaat illuanni inissinneqarnera pillugu nassuiaanissaminut kommunip periarfissaa aamma suliap ingerlasimanera pillugu nassuiaanisaminut kommunip periarfissaa ilaatigut killilerpai. Tassani aamma ilaavoq A-p illoqarfimmi Y-mi utoqqaat illuanni inissinneqarnissaanik kia aalajangiisimaneranik, aalajangiinermut inatsisikkut tunngaviusup suuneranik aalajangiinerullu A-mut qanoq iliorluni nalunaarutigineqarsimaneranik kommunip oqaaseqaammuni nassuiaasinnaasimannginnera.

Tamanna isorisarialittut isigaara.

Isumaqarpunga kommuni inissiiniarluni ataatsimiinneq A-p illoqarfimmi Y-mi utoqqaat illuannut inissinneqarnissaanik aalajangiiviusimasoq pillugu imaqarniliorsimasariaqaraluartoq. Aamma isumarpunga kommuni, ingerlatsinermi ileqqorissaarneq malillugu, A-p illoqarfimmi Y-mi utoqqaat illuannut inissinneqarneranut atatillugu suliamik suliarinninnerup ingerlanerani suliami allattuisarsimasariaqaraluartoq, suliap ingerlasimanera pillugu uppersaataatissaqarsinnaajumalluni.

Kommuni qinnuigaara oqaaseqaatima kommuni qanoq iliuuseqarnissamut pissutissaqalersinneraa uannut nalunaarutigeqqullugu.

Suliami annertunerusutigut kukkussuteqartoqarsimasoq sumiginnaasoqarsimasorlu isumaqarama Inatsisartut Inatsisinut Ataatsimiititaliaat aamma kommunalbestyrelsi oqaaseqaammik Inatsisartut Ombudsmandiat pillugu Inatsisartut inatsisaanni nr. 7-imi, 1. juni 2017-imeersumi § 23 tunngavigalugu nalunaarfigaakka.

Oqaaseqaat manna oqaaseqaammi pineqartut ilisarnarunnaarsillugit nittartak-
kanni tamanut saqqummiunneqarumaarpoq 2023-milu ukiumoortumik nalunaa-
rutinni eqqaaneqarumaarluni.

Oqaaseqaatip matuma assilinera A-mut nassiuppara.

SULIAP INGERLASIMANERATA ALLAASERINEQARNERA

Suliami allattuiffimmi allatamit 20. februar 2020-meersumit erserpoq nunaqarfimmit X-imit ilisimatitsissut tiguneqarsimasoq. Allatamit tassannga ilaatigut makku erserput:

“[A] [...] puiortunngortutut nappaateqaleriartortup illuanut tungatillugu iserama allagaqaatiga ingerlatippara.”

Suliami allagaatinut ilaavoq nunaqarfimmi X-imi Innuttaasunik Nunaqarfinnillu Sullissiviup illoqarfimmi Y-mi utoqqaat innarluutilillu angerlarsimaffiini ikiortinut immikkoortortaqarfimmut allagai 20. februar 2020-meersut. Allakkanit taakunannga makku erserput:

“Ullukkut suliaqarlunga illuanut iserama maluginiarpara sivirusumik suliarineqarsimanngitsoq, asanneqarani erruiffiusimannngilaq, nateq assattariaqarpoq, errugassallu errorneqartariaqarlutik.

Funktionsskema suliarineqarnissaa isumaginissaalu sulissutigineqarnissaa inassuti-gaara.

Eqqiarneqarluni suliarineqarnerani inuttaa allami inissisimasariaqassooq.

Silarleq paarleq igaffik torersarlugit naggataagut natia asallugu. Errugassallu errortiterlugit.

Ulloq ataaseq illu suliasartaa isumagineqarnaviannnginneri naliliinermi isumagineqassooq.

Ilanngullugu illup iluata sulianeqarnerani utoqqaat pisinnaanerusut najugaanni najugaqarnissaa inuttaanut paasittariaqassooq.

Funktionsskema suliarineqarnissaa kissaatigaara, taannalu malillugu sulinneqarnissaa isumagalugu.”

Suliami allagaatinut ilaavoq akuersinermut uppernarsaalluni atsiugaq 20. februar 2020-meersoq. Akuersinermut uppernarsaalluni atsiugaq A-p atsiorsimavaa, pui-

gortunngorsimanersorlu misissorneqarsimanersoq peqqinnissaqarfimmit paasisutissanik pissarsiniarnerumanermut tungasuulluni. Suliami allattuiffimmi ulloq taanna allatamit erserpoq paasissutissanik pissarsiniarnissamut akuersinermut uppernarsaat atsiorneqarsimasoq qinnutigisarlu illoqarfimmi Z-imi napparsimmavimmut nassiunneqarsimasoq.

Suliami allattuiffimmi allatamit 25. februar 2020-meersumit erserpoq A utoqqaat najugaqaqatigiiffiannut nukingiullugu inissinneqarsimasoq. Aamma tassannga erserpoq angerlarsimaffimmi ikiortinik ataqatigiissaarisoq kommunimi suliamik suliarinnittumut imatut allassimasoq:

“[A] sukanerpaamik utoqqaat pisinaanerusut najugaannut nuutineqarpoq solareerussimavoq. Uffa kisimiilluni meeqqat marluk ilaginerarpaai. Oqarsimavoq kisiat nivarsiaaraq qipissaqartoq.”

Suliami allattuiffimmi allatamit 13. marts 2020-meersumit makku erserput:

“Pillugu [A, cpr.nr. ...] puujortunngorsimanermut misissorneqareerluni, nunaqarfimmut X-imut uteqqinerani paasivarput nammineq angerlarsimaffimminut uteqqissimasoq.

Ullumi utoqqaat pisinaanerussut angerlarsimaffianni sulisoq piumasaqarfigivara aaq-qullugu, sulisoq akuersivoq. Tassungalu atatillugu angerlarsimaffimmi ikiortiata ornittaannassavaa ullormut 2 timer ilagisassallugu.”

Napparsimmaviup kommunimut allakkatigut 27. marts 2020-meersutigut makku paasissutissiissutigai:

“Pineqartoq [illoqarfimmi Z-imi] napparsimmavimmi 28-02-2020-mit 6-03-2020-mut uninngavoq, puigortunngorsimasutut pasitsaassineq pissutigalugu misissorneqarluni.

Puigortunngorsimanersoq misissuinermi naliliisoqarpoq akunnattumik sakkortussuseqartumik puigortunngorsimasoq.

Pineqartoq tusillassimammat tusartaatissaa inniminnerneqarpoq.

Isumaginninnermik ingerlatsivik attaveqarfigineqassaaq, [nunaqarfimmi X-imi] utoqqaat najugaqaqatigiiffiannut pisinnaanera siunertaralugu.” (Ombudsmandeqarfimmi nutsigaavoq)

Suliami allattuiffimmi allatamit 7. april 2020-meersumit erserpoq nakorsap naliinera nunaqarfimmi X-imi utoqqaat illuannut, illoqarfimmi Y-mi pensioninut tunngasunik suliassaqarfimmi sullissisumut aamma angerlarsimaffimmi ikiorteqartitsinermik ataqatigiissaarisumut nassiunneqarsimasoq. Siuliani taaneqareersut saniatigut makku erserput:

“Ataani atsiortunga pisortaasoq ullaq oqaloqatigaara, oqarporlu nalunaaquttap akunnerini nal. 7-imit 15-imut sulinermini [A] paariuminaatsutut misigisarsimangikkini, ulluinnarni ilisimasaqarfigivallaangikkini tapersersortitullu ikiorti ullormut nalunaaquttap akunnerini marlunni sulisartoq innersuussutigalugu.” (Ombudsmandeqarfimmi nutsigaavoq)

Nunaqarfimmi X-imi utoqqaat najugaqaqatigiiffianni inissamik qinnuteqaat A-mit 14. april 2020-mi atsiorneqarsimasoq piuvoq.

Nunaqarfimmi X-imi utoqqaat illuata kommunimut e-mailia 3. august 2020-meersoq piuvoq. E-mailimit tassannga ilaatigut makku erserput:

“Maani [nunaqarfimmi X-imi] Utoqqaat najugaani najugaqarallartoq maaniilermat nalunaarutigineqarnikuuvoq utaqqiisaagallartimik MAANI NAJUGAQARALLARTOQ, IMATUT PAASILLUGU [ILLOQARFIMMI Y-MI] UTOQQAAT NAJUGAAAT NAAMASSINIS- SAATA TUNGAANUT MAANI NAJUGAQARTINNEQARPOQ TAAVALU PIUIORTUNNGO- RIARTORTUUVOQ TAKORRUUISARTUULLUNILU, KISIANNI ULLUINNARNI ULLUNILU IMATUT ANNERTUUMIK MALUNNARNANI. TAANNA PILLUGU SULISUSSAMIK QIN- NUTEQARATTA QANGALINNGORPOQ, SULILU AKISSUTEQARFIGINEQARNATA. TAAVA MAANI NAJUGAQAQQAALERAMI EQQISSILLUNI NAJUGAQARIARLINI SIVITSORiar- TORNERANI ILLUMINUT ANGERLARTUAANNALEQQAVOQ, QAAMATIP NAAJARTORNE- RANI MAANI NERIARTUINNARIARLUNI ILLUMINUT SINIKKIARTORTARLUNI NAMMI- NEROOQ KISIMIINEQ SUNGIUSIMANERUGAMIUK. UAGULLU PINNGITSAALISINNAAN- NGILARPUT MAANI UNINNGAANNARNISSAANIK. SOORLUMILU MAANI NAJUGQAR- NERMINUT NERISAQARNERMINULLU ILANNGAAVIGINEQARTARSIMANANI. TAAVAMI UAGUT SULISUUSUGUT TAANNA PILLUGU QANOQ QISUARIAATEQASSANERPUGUT.”

Suliami allattuiffimmi allatamit 3. august 2020-meersumit erserpoq illoqarfimmi Y-mi utoqqaat illuat piareersaatiminik kinguaattoorsimasoq.

Suliami allattuiffimmi allatamit 14. september 2020-meersumit ilaatigut makku erserput:

“Pineqartoq [A, cpr.nr. ...] maani [nunaqaarfimmi X-imi] utoqqaat najugaannit anivinnikuuvoq, pinngitsaalisinnaangilarput.

Maani najugaqarimangimmat sulisunnut oqarsimavoq namminerooq ineqateqarneq nalugamiuk. [...]”

Suliami allattuiffimmi allatamit 17. september 2020-meersumit pillorissaasut angalatitat A-mut taassuma nammineq angerlarsimaffiani pulaarnerat tunngavigalugu suliarineqarsimasumit makku erserput:

“**Siunertaa:** Innuttaasoq takusarneqarpoq, nunaqarfimmi sullissisoq aperimmat alakarsinnaaneripput, angerlarsimaffimmi ikiorteqarumangimmat il.il.

Kingornatigut

najuuttut: Innutaasoq, pillorissaasup ikiortaa (oqaluuttajutigisoq), nunaqarfimmi sullissisoq pillorissaasorlu ([...]).

15-09-20

[A] pulaarneqarpoq, peqqissusiami atugarissaarneralu assut ernummatigineqarmata. [A] nammineq angerlarsimaffimmini kisimiippoq. Utoqqaat najugaqaqatigiiffianniittarpoq, naliliisoqarmammi kisimiilluni najugaqarsinnaanngitsoq. [A-lli] tassani najugaqarnissani kissaatiginngilaa, oqarsimallunilu arajutsinaveersaarneqartutut misigisimalluni. Nunaqarfimmi sullissisup oqaatigaa [A] puigortunngorsimasoq, takorruuniartarluni sakkortusaarniartutullu pissusilersortarluni. Angerlarsimaffia tukappoq ipertoorujussuullunilu. Sukujuppassuit nerrivimmiipput natermiillutillu. Kissarsuut kissaaviillu marluk ikumapput, kiassaataaniarunarlutik. Iseqquneqarpugut, pineqartorlu pissusilersornermini eqqissisimarpasippoq. Talii niuilu sajulaartut takuneqarsinnaavoq. [A] ermissimasutut ipeqarpallaanngitsutullu isikkoqarpoq, oqaluttuarporlu innuttaasut iluanni uffarfik atortarini. Aperineqarluni oqarpoq angerlarsimaffimmini nerisassior-

tarluni, nalorninarporli qanoq iliorluni sunillu nerisassioartarsimanersoq. Oqalutsi oqarpoq sumut tamaanga sammisunik oqaluttoq, apeqqutigineqartunullu akissuteqarniarnermini ajornartorsiuteqarnermi saniatigut aamma tusilakuluttuuvoq, tamatumalu attaveqaaqatigiinniarneq ajornakusuulersippaa. Ilaannili apeqqutigineqartut iluamik akisarpai, pingaartumik suna soqutigisani nammineq oqaluuseriumasani pineqaraangat. Angerlarsimaffimmi ikiorteqarnissaa siusinnerusukkut neqeroorutigine-qarsimavoq, taannali naggataatigut anisissimavaa. Angerlarsimaffimmili ikiorteqarnissamik neqeroorut ullumikkut qujaruppa, isumaqatigiissutigineqarporlu pineqartoq takkunnariarpat [A] attaveqarfigineqarumaartoq. Oqarpoq eqqiaanermut atisanillu errorsinermut ikiorneqarnissani kissaatigigini. [...] (angerlarsimaffimmi ikiorteqartitsinermik ataqatigiissaarisoq) attaveqarfigineqarsimavoq, angerlarsimaffimmi ikiorteqarnerup aallartinneqarnissaa siunertaralugu. Taannali oqarpoq pineqartoq pillugu suliamik massakkut ingerlasoqartoq, suunerali oqaatiginagu, kisianni immaqa peqqissusiata atugarissaarneratalu ernummatigineqarnerat tunngavigalugu.

Sulinermtu atallugu tullianik angalaneq: Pineqartup ataatsimut malitseqartitsivigineqarnera. Sumi najugaqarnersoq sutigullu ikiorneqarnersoq?" Ombudsmandeqarfimmi nutsigaavoq

Suliami allattuiffimmi allatamit 15. oktober 2020-meersumit makku erserput:

"[Nunaqarfimmi X-imiinnitsinni] [...-lu] ([illoqarfimmi Y-mi] utoqqaat illuanni tullersorti) [A] pulaarparput.

Angerlarsimaffia tukattorujussuuvoq, peqqinnangvivippoq, tipittorujussuulluni, illup ilua tamavimmi paatsiveqanngilaq, nateq, nerriviip nerriviisallu qaavi assigiimmik eqqaavittut isikkoqarput, sukutsia tamarmi ipertoorujussuuvoq, natermi igaakut qangali uninngasimarparsippat nikisinneqaratik. Siniffiisinnaasumik saqqumisoqanngilaq taamaattorli madressikoq issiavissuup qaaniippoq, natermut ilisarsimarpasippaa hyndenik allequtserlugu innarfigisarsimarpasillugu.

Inuttaa utoqqaat pisinnaanerusut angerlarsimaffiannut [nunaqarfimmi X-imiittumut] nuutinneqarnikuugaluarpoq, nammineerlunili angerlaqqissimalluni pialuutini aallatkaarlugit tamakkingajassimavai, atisamininnguit errortat minillugit.

Visitationernitsinni kingullermi aaliangiunneqarnikuuvoq [A] [illoqarfimmi Y-mi] utoqqaat illuanut nuutinneqassasoq, kujammukaqqilerutta ilagissallugu kiminniarsarivar-

put, tusilartuummat tusaasaqarsinnaanani allaffigeqattaarlugu siullermik [illoqarfimmi Y-mi] utoqqaat illuani qasuersaassasoq ilisimatillugu, nangaariarmat allaffigivara fee-riassaseq, aatsaat inuttaa piualermat ilisimatipparput aqagumut nal. 14:00 aallasagatta nassatassaminik poortuissasoq.

Aqaguani ornipparput poortuereerluni illumi silataanut iliorareersimagai. Massakut Utoqqaat illuaniippoq aallaqqaammut "qasuersaartutut" taallugu, tappikaniinnerani ineqalivinnissaanut sungiisassallugu.

Maaniinnerani illua eqqartariaqarpoq, atunngitsullu eqqarlugit."

Suliami allattuiffimmi allatamit 13. januar 2021-meersumit erserpoq nappaam-
mik suussusiliisoqarsinnaalinnginnerani pillorissaanikkut sulinermi puigortun-
ngorsimanermik misissuisoqarsimasoq, misissugassamik aaviisoqassasoq kiisalu
nakorsamit oqaloqatigineqassasoq.

Ombudsmandeqarfimmit misissuiartortut illoqarfimmi Y-mi utoqqaat illuanni mi-
sissuineq 2021-mi majimi ingerlappaat.

Kommunimut 29. november 2021-mi ilaatigut imatut allappunga:

"Misissuiartortut Inatsisartut Ombudsmandeqarfianneersut 12. aamma 13. maj 2021-
mi [illoqarfimmi Y-mi] utoqqaat illuanni misissuineramik ingerlatsipput.

Misissuinerup ingerlanerani pisortaqatigiit ilisimatitsissutigaat najugaqartoq [A] piu-
manngitsoq utoqqaat illuanni najugaqartussanngortinneqarsimasoq. Pisortaqatigiit
aammattaaq oqaatigaat najugaqartup utoqqaat illuanni najugaqarnini massakut
nuannarilersimagaa. Kiisalu pisortaqatigiit oqaatigaat najugaqartoq nakkutilliisulerne-
qarsimanngitsoq.

[A] allakkatigut 14. september 2021-meersutigut nalunaarfigaara suliamik misissui-
nerup aallartinnissaa isumaliutersuutigigiga. Qinnuigaara tamatuma oqaaseqaatissa-
qalersippani oqaaseqaatini uannut nalunaarutigeqqullugit. [A] tusarfiginngilara. Utoq-
qaat illuata e-mailikkut 29. oktober 2021-meersukkut nalunaarfigaanga [A] allakkan-
nik nipituumik atuffanneqarsimasoq, soqutigisaqarpasissimanngitsorli akissuteqarani-
lu.

Tamanna tunngavigalugu aalajangerpunga [A-p] [illoqaarfimmi Y-mi] utoqqaat illuanni inissinneqarnera pillugu suliamik misissuineramik aallartitsiniarlunga. Ombudsmandi pillugu inatsimmi § 15, imm. 1 innersuussutigaa, tassuunalu aalajangersarneqarpoq Ombudsmandi suliamik nammineerluni misissuiffiginnilersinnaasoq.

Kommuni Kujalleq qinnuigaara suliami [A-] [illoqaarfimmi Y-mi] utoqqaat illuanni inissinneqarneranut tunngasumi **allagaatit tamaasa** misissuininni atugassatut uannut nassiuteqqullugit.

Kommuni Kujalleq aammattaaq qinnuigaara suliaq pillugu **oqaaseqaateqaqqullugu**.

Kommuni Kujalleq qinnuigaara oqaaseqaammini ilaatigut makku pillugit nassuiaateqaqqullugu, tassalu kommunip paasinninnera unaanersoq [A]:

- a) Utoqqaat illuanni inissinneqarnissaminut akuersisimasoq,
- b) inissinneqarnissani akerlerisimagaa imaluunniit
- c) paasinartumik tamatumunnga akuersinissamut piginnaasaqarsimanngitsoq.

[A] akuersisimanngitsoq Kommuni Kujalleq isumaqarpat kommuni aammattaaq qinnuigaara makku paasissutissiissutigeqqullugit:

- 1) A utoqqaat illuanni inissinneqassasoq kikkut aalajangiisimanersut,
- 2) aalajangiineq [A-mut] qanoq iliorluni nalunaarutigineqarsimanersoq,
- 3) [A-p] nakkutilliisusnaanik toqqaasoqarsimanersoq aamma
- 4) taamatut aalajangiinermut inatsisikkut suna tunngavigineqarsimanersoq, matumani aalajangiineq pissaanermik atuisarneq pillugu inatsimmi (Isumaginninnermik suliaassarqarfimmi pissaanermik atuineq pillugu Inatsisartut inatsisaanni nr. 1-imi, 21. november 2013-imeersumi, kingusinnerusukkut allannguuteqartinneqarsimasumi) malittarissanut naapertuuttuunersoq ilanngullugu eqqarsaatigalugu.

Pissaanermik atuisarneq pillugu inatsit aalajangersakkanik assigiinngitsunik inuit nuunnissamut akerliusut imaluunniit tamatumunnga paasinartumik akuersinissamut piginnaasaqanngitsut najugaqarfissatut neqeroorutini najugaqartussanngortinneqar-tarnerannut tunngasunik imaqarpoq.

Aalajangersakkat ilaatigut §§-ini 36-mi, 42-mi, 43-mi, 49-mi aamma 50-imi takuneqarsinnaapput. Aalajangersakkani taakkunani ilaatigut aalajangersarneqarpoq akuersisitsinani najugaqartussanngortitsisoqassasoq aalajangiineq inatsimmik unioqqutitsi-

suussanngippat kikkut aalajangiissanersut piumasaqaatillu suut eqqortinneqarsimas-
sanersut. Aalajangersakkat tamatuma saniatigut inatsiseqartitsinermi innarlitsaaline-
qarnissaq eqqarsaatigalugu qularnaveeqqutinik assigiinngitsunik ima qarput, matuma-
ni Isumagininnermi Naammagittaalliuteqartarfimmut naammagittaalliuteqarsin-30

naaneq, aalajangiinerit eqqartuussivimmi misilinneqarnissaasa immikkut ajornanngin-
nerusumik suliassanngortinneqarsinnaanerit, kommunalbestyrelsip eqqartuussissuse-
risumit ikiorneqarnermut akiliisussaataitaneramik inullu pineqartoq sinnerlugu nakku-
tilliusussamik toqqaqqullugu eqqartuussisoqarfimmut qinnuteqartussaataitanera ilan-
ngullugit eqqarsaatigalugit.

[...]"

Suliami allagaatit kommunillu oqaaseqaataa 7. januar 2022-mi ullulerneqarsi-
masoq e-mailikkut 24. januar 2022-meersukkut tiguakka. Makku oqaaseqaammit
erserput:

"Oqaaseqaat – Ombudsmandip suliaataa 2021-907-0001-imik j. normoqartoq

[...]

Kommunip paasissutissiissutiginiarpaa kommuni [A-p] [illoqarfimmi Y-mi] utoqqaat il-
luanni akuersitinnagu inissinneqarnissaanik aalajangiisimannngimmat, tak. isumagin-
ninnermik suliassaqarfimmi pissaanermik atuineq pillugu Inatsisartut inatsisaanni nr.
1-imi, 21. november 2013-imeersumi § 36.

Kommunip aamma paasissutissiissutiginiarpaa kommunip paasinninnera unaasoq [A]
inissinneqarnerminut naggataatigut pinaakkunnaartoq, immaqali [nunaqarfimmi X-
imi] illuminit aallalernermini utoqqaat illuannut qasuersaariartorluni aallarumanerluni
aallarumannginnerlunillunniit nalornissutigisimallugu. [Illoqarfimmili Y-mi] "feriartus-
saasoq" oqarfigineqarami aallarusulerpoq, namminerlu piumassutsi malillugu pinngit-
saalineqarani aallarluni. Taamaattumik aallarnermini angalanerup siunertaanik naam-
mattumilluunniit paasissutissiineq tunngavigalugu aalajangiinissaminut paasissutissa-
nik pisariaqartunik tamanik naammattumik paasisaqarsimannnginnissaa ilimagineqar-
sinnaavoq.

Kommunip tikkuarlugu aamma oqaatiginiarpaa [A-p] utoqqaat illuanni najugaqartus-
satut inissinneqarneranut atatillugu pisut tamaasa immikkuualuttulersugaanerusumik
allaaserineqarnissaa massakkut ajornassagunartoq, sulisummi arlallit pisup ingerlane-
rani sulisuusimasut kommunimi atorfeqarunnaarsimmata.

Suliami allagaatinik oqaaseqaatinillu nassiussinerup kinguaattoornera kommunip ajuusaarutigaa, kinguaattoornerlu tamanna aqutsinermi allaffissornikkut pissutsinik pissuteqarpoq. (Ombudsmandeqarfimmi nutsigaavoq)

Suliami allagaatini ilaavoq illoqarfimmi Y-mi utoqqaat illuanni pisortap kommunimut e-mailia 4. januar 2022-meersoq. E-mailimit tassannga makku erserput:

“Taamani [A] ulloq 14.10.21 maannga [illoqarfimmut Y-mut] ilaaqatiginikuuara ukua ilagalugit aqutsisoq plejehjemmet, hjemmehjælperkoordinator [illoqarfik Y].

Hjemmehjælperkoordinator ulloq 14.10.21 taanna ilagivara [A-p] illuanut. Qasuersaariassalluni ippassaammagu akuersisimavoq, kisiannilu 1 time aallarfiisarput nallilersoq piumajunnaarpoq, allatut oqaatigiinarlugu feriassasoq [illoqarfimmut Y-mut] piumalerpoq aatsaat tassani. Immaqa ukua akissutissaanik c) paasinartumik tamatumunnga akuersinissamut piginnaasaqarsimangitsoq qaninnerpaavoq.

Una naqqarleq akinissaanut akunnattooqqavunga akisinnaannagulu.

Neriullunga kakkiussamiittut aamma assit atorsinnaassasut ilannguppakka.”

A-p illuanit assilisat e-mailimut kakkiunneqarsimapput. Assini taakkunani angerlarsimaffik tukattoq sorpassuarnik eqqagassanik ilaqartunik sumi tamaani natermilu ilisalik takuneqarsinnaavoq.